

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA,
PENGGAL KETIGA, PARLIMEN KEEMPAT BELAS**

PERTANYAAN : BERTULIS

DARIPADA : YB TUAN HAJI WAN HASSAN BIN MOHD RAMLI [DUNGUN]

SOALAN

Minta **MENTERI PEMBANGUNAN USAHAWAN DAN KOPERASI** menyatakan perkembangan industri ‘Affiliate’ dalam negara dan apakah rangsangan industri ini dalam memajukan ekonomi negara.

JAWAPAN

Tuan Yang di-Pertua,

1. Dalam usaha membantu perkembangan industri ‘Affiliate’ dalam negara, Kementerian Pembangunan Usahawan dan Koperasi (MEDAC) melalui SME Bank memperuntukkan sejumlah RM500 juta bagi membantu aktiviti ekonomi usahawan PKS melalui program *SME Technology Transformation Fund (STTF)* di bawah Pelan Jana Semula Ekonomi Negara (PENJANA).
2. Selain itu, SME Corp Malaysia juga menawarkan program-program seperti berikut:-
 - i. **Program Women Netpreneur** yang bertujuan menggalakkan golongan wanita untuk menjalankan perniagaan dalam talian. Sejak mula dilaksanakan pada tahun 2017, seramai 1,592 wanita telah mendapat manfaat dari program tersebut.
 - ii. **Program Micro Connector** yang bertujuan memberi latihan khusus di peringkat awal bagi perusahaan mikro untuk menujuhkan dan

menjalankan perniagaan serta melatih dan menggalakkan usahawan baharu untuk menjana pendapatan melalui dalam talian. Sejak diperkenalkan pada tahun 2016, sebanyak 107 PKS termasuk golongan penjaja dan peniaga mikro telah mendapat manfaat dari program ini.

3. Di bawah INSKEN pula, antara program yang dijalankan adalah:

i. *Bizlive* (Sesi Perkongsian Secara Atas Talian)

- Program ini merupakan program perkongsian ilmu melibatkan BisKaunselor INSKEN/ Usahawan Berjaya
- Dilaksanakan sehari sekali
- Sehingga kini 129 sesi telah dilaksanakan.

ii. INSKEN Industry Based Business Coaching (IBBC)

- Bertujuan untuk membantu usahawan mendapat '*quick win*' dan mampu terus bertahan dalam industri perniagaan mereka.
- Selama sebulan dan merangkumi 8 sesi '*group coaching*' bagi setiap kumpulan.
- Terdapat 7 kumpulan yang menyertai program ini dan meliputi industri berikut - bakeri, kafe & restoran, jahitan, SPA, *wedding planner* & jualan secara *online*.

iii. *Business Enhancement Programme*

- *Coaching* selama 4 bulan tidak mengikut industri oleh BisKaunselor INSKEN.
- *Outcome*: Peningkatan jualan sekurangnya 20% dan membuka peluang pekerjaan baru sekiranya berkenaan.

iv. INSKEN e-BizClinic

- Dilaksanakan bagi menyampaikan khidmat perundingan dan menyediakan *platform* yang sesuai kepada pengusaha/ usahawan
- Sehingga kini seramai 400 usahawan telah mendaftar.

v. INSKEN Documentation Review and Coaching

- Membantu usahawan bagi dokumentasi bantuan pembiayaan

- Sehingga kini 694 permohonan diterima dan dibimbing oleh 19 BisKaunselor.

vi. INSKEN *Online Training*

- Latihan atas talian dilaksanakan oleh BisKaunselor INSKEN
- Sasaran minuman 25 usahawan untuk setiap sesi
- 2 sesi latihan keusahawanan setiap minggu

vii. INSKEN *Masterclass*

- Sesi perkongsian dan networking oleh pakar-pakar pasaran dan platform sedia ada.
- Topik: Statistik, isu semasa, trend, dan peluang untuk masuk ke pasaran/platform yang dibincangkan.
- Sasaran minimum 50 usahawan untuk setiap sesi, 2 sesi setiap bulan.

Sekian, terima kasih.

**PEMBERITAHUAN PERTANYAAN BUKAN LISAN
MESYUARAT KEDUA, PENGGAL KETIGA,
PARLIMEN KEEMPAT BELAS
DEWAN RAKYAT**

PERTANYAAN : BUKAN LISAN

**DARIPADA : TUAN WILLIAM LEONG JEE KEEN
[SELAYANG]**

SOALAN

Minta **PERDANA MENTERI** menyatakan secara terperinci hala tuju dasar jangka panjang ekonomi negara dan langkah-langkah Kerajaan bagi menstruktur semula ekonomi negara yang sejajar dengan Wawasan Kemakmuran Bersama.

JAWAPAN

**YB DATO' SRI MUSTAPA BIN MOHAMED,
MENTERI DI JABATAN PERDANA MENTERI (EKONOMI)**

Yang di-Pertua,

1. Wawasan Kemakmuran Bersama 2030 (WKB 2030) merupakan hala tuju baharu pembangunan negara bagi tempoh 10 tahun mulai tahun 2021 hingga 2030. Matlamat utama WKB 2030 adalah untuk membolehkan rakyat Malaysia secara keseluruhannya dapat mengecapi taraf hidup wajar atau dengan izin “*decent standard of living*” menjelang tahun 2030. WKB 2030 menetapkan tiga objektif utama, iaitu Pembangunan untuk Semua, Menangani Jurang Kekayaan dan Pendapatan serta Negara Bersatu, Makmur dan Bermaruah. Terdapat 10 sasaran utama ditetapkan untuk mencapai objektif WKB 2030 termasuk kadar pertumbuhan keluaran dalam negeri kasar (KDNK) disasarkan berkembang sebanyak 4.7% setahun. Selain itu, bagi mengurangkan jurang pendapatan antara kaum, nisbah pendapatan penengah kumpulan etnik Bumiputera, Cina dan India disasarkan pada nisbah 0.9:1:1. Purata

pendapatan bagi mencapai taraf hidup wajar pula disasarkan tidak kurang daripada RM5,800 sebulan untuk kumpulan isi rumah B40.

2. Untuk makluman Ahli Yang Berhormat, Kerajaan Perikatan Nasional telah memutuskan untuk meneruskan WKB 2030 sebagai pelan pembangunan jangka panjang negara yang akan dilaksanakan di bawah Rancangan Malaysia Kedua Belas, 2021-2025 (RMKe-12) dan Rancangan Malaysia Ketiga Belas, 2026-2030. Pelbagai dasar dan strategi khusus yang akan dijajarkan dengan objektif WKB 2030 akan dirangka di bawah RMKe-12 yang merupakan fasa pertama pelaksanaan WKB 2030.
3. Objektif pertama WKB 2030 adalah untuk menstruktur semula ekonomi ke arah yang lebih progresif, berpaksikan ilmu dan bernilai tinggi. Ini termasuklah mewujudkan peluang-peluang pekerjaan yang berpendapatan tinggi dan memastikan kuasa beli rakyat ditingkatkan. Selain memperkuuhkan sektor pertumbuhan ekonomi sedia ada, tumpuan akan diberi untuk mempergiat aktiviti pertumbuhan ekonomi masa hadapan yang berpotensi untuk berkembang pesat sejajar dengan perubahan teknologi. Di samping itu, Kerajaan juga akan memastikan usaha untuk memacu produktiviti bagi memastikan pertumbuhan yang mampan dan inklusif diteruskan, menggalakkan pelaburan berkualiti serta melaksanakan inisiatif untuk beralih kepada rantaian nilai yang lebih tinggi. Di samping itu, pelbagai bentuk penambahbaikan dan reformasi institusi akan terus dilaksanakan.
4. Bagi mengurangkan jurang kekayaan dan pendapatan pula, Kerajaan akan memberi tumpuan kepada usaha menangani jurang ekonomi antara kumpulan pendapatan, etnik dan wilayah untuk meningkatkan keupayaan semua rakyat supaya tiada yang ketinggalan. Dalam hal ini, pengukuran kadar kemiskinan telah disemak semula dengan menetapkan Paras Garis Kemiskinan (PGK) baharu iaitu sebanyak RM2,208 sebulan. Selain itu, kategori isi rumah telah dikelaskan semula kepada 10 kategori termasuk memperincikan kumpulan B40 kepada B1, B2, B3 dan B4. PGK baharu dan perincian pengelasan ini serta nilai pekali Gini yang terkini sebanyak 0.407 akan digunakan sebagai asas dalam pengukuran kadar kemiskinan dan jurang kekayaan dalam menyusun strategi di bawah RMKe-12. Asas pengukuran baharu ini akan membolehkan perancangan program yang

lebih bersasar dapat dilaksanakan bagi merapatkan jurang pendapatan antara isi rumah.

5. Selain itu, bagi memastikan pertumbuhan yang lebih inklusif dan tidak bertumpu kepada sesuatu wilayah sahaja, pembangunan akan dibawa ke seluruh negara, terutamanya di negeri yang kurang membangun. Pemetaan titik tumpuan ekonomi, dengan izin, *economic hot spots*, akan dilaksanakan bagi mengenal pasti kawasan luar bandar yang berpotensi sebagai pusat aktiviti ekonomi yang mampan. Malaysia juga akan memanfaatkan peluang daripada perkembangan peralihan ekonomi dunia dari Eropah ke Asia dengan menjadikan negara sebagai Hub Ekonomi ASEAN.

6. Dalam usaha untuk membentuk Malaysia sebagai sebuah negara yang bersatu, makmur dan bermaruah, Kerajaan akan menumpukan kepada usaha untuk mengukuhkan perpaduan nasional dan meningkatkan modal sosial ke arah mewujudkan masyarakat yang aman, harmoni dan bersatu. Sistem pendidikan akan memberi tumpuan kepada usaha ke arah memupuk semangat patriotisme dan cintakan negara. Di samping itu, peluang dan ruang untuk interaksi sosial yang lebih baik dan kondusif akan diperluaskan bagi menggalakkan interaksi antara masyarakat dalam usaha memupuk perpaduan yang lebih utuh. Amalan tadbir urus Kerajaan juga akan diperkuuh berpandukan kepada prinsip mementingkan integriti bagi menjadikan Malaysia sebagai sebuah negara yang bersatu, makmur dan bermaruah.

7. RMKe-12 yang dijadualkan untuk dibentangkan kepada Parlimen pada Ogos 2020 telah ditangguhkan kepada tahun hadapan. Penangguhan ini bagi membolehkan Kerajaan menyusun semula strategi perancangan ekonomi mengambil kira ketidaktentuan ekonomi global dan kesan pandemik COVID-19 serta beberapa cabaran luaran yang lain. Tumpuan Kerajaan pada masa kini adalah untuk memastikan pelan pemulihian pasca COVID-19 dapat digerakkan dengan lebih cepat dan dapat memberi kesan positif kepada rakyat dan negara.

8. Untuk makluman Ahli Yang Berhormat, ekonomi Malaysia telah berkembang sebanyak 0.7% pada suku pertama 2020, iaitu lebih baik daripada jangkaan kebanyakan pakar ekonomi meskipun berhadapan dengan persekitaran yang mencabar kesan daripada pandemik COVID-

19. Pertumbuhan ekonomi negara dijangka bertambah baik pada separuh kedua tahun ini berikutan langkah Kerajaan membuka semula sektor ekonomi yang disokong oleh beberapa pakej rangsangan ekonomi.

9. Kerajaan telah memperkenalkan Pakej Rangsangan Ekonomi Prihatin Rakyat (PRIHATIN) yang berjumlah RM260 bilion pada Mac 2020 bagi menjaga kesejahteraan rakyat, menyokong kelestarian perniagaan, khususnya PKS, dan memastikan kelangsungan kegiatan ekonomi utama. PRIHATIN yang bernilai 19% kepada KDNK adalah antara pakej rangsangan yang terbesar di kalangan negara membangun. Di samping itu, Pelan Jana Semula Ekonomi Negara (PENJANA) bernilai RM35 bilion turut diperkenalkan pada Jun 2020. PENJANA memberi fokus kepada tiga teras utama, iaitu untuk memperkasakan rakyat, melonjakkan perniagaan dan merangsang ekonomi. Ianya merangkumi langkah-langkah untuk melindungi pekerjaan, mempromosikan pekerjaan serta membolehkan perniagaan mengekalkan operasi dan meningkatkan produktiviti secara beransur-ansur.

10. Kerajaan melalui Majlis Tindakan Ekonomi (EAC) sedang dalam proses penyediaan pelan pemulihan ekonomi jangka sederhana hingga panjang. Pelan ini yang akan dibentangkan pada bulan Oktober 2020 memberi tumpuan kepada penambahbaikan dalam pasaran buruh, penambahbaikan peraturan dan pengukuhan persaingan dalam pasaran, isu pelaburan berkualiti, reformasi institusi awam dan kerangka urus tadbir serta pelaksanaan pendigitalan dan Revolusi Perindustrian Keempat. Selain daripada itu, peranan sektor awam dan swasta juga akan diteliti semula dalam menyokong pertumbuhan dan kelestarian ekonomi Malaysia dalam jangka masa panjang.

11. Kerajaan akan memastikan pertumbuhan jangka panjang adalah berkualiti, inklusif dan mampan untuk membolehkan ekonomi rakyat dapat dipulihkan, manakala kesejahteraan dan kekayaan negara dapat dikongsi bersama. Kerajaan yakin melalui pelbagai usaha dan langkah proaktif yang dilaksanakan oleh Kerajaan, ekonomi Malaysia akan lebih berdaya tahan dan berdaya saing serta seluruh rakyat Malaysia dapat mengecapi kemakmuran secara bersama.

Sekian, terima kasih.